

DONESIMO VAŽNE ODLUKE!

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji se raduju mjesecu Ramazanu i za njega se temeljito pripremaju.

Braćo moja u Dini Islamu! Pred nama je nešto malo manje od tri sedmice do početka mubarek-mjeseca Ramazana, što znači da naše pripreme za njegov dolazak ulaze u zahuktalu fazu. Već smo rekli da u drugoj polovini mjeseca Ša'bana nije preporučeno da se posti, zato možemo iskoristiti i postiti preostale dane prve polovine mjeseca, među kojima su i tzv. bijeli dani (13., 14. i 15.) Što se tiče ostalih ibadeta i nafila, nema smetnje da se obavljaju svakog dana do početka mjeseca Ramazana, sa ciljem da se sa tim ibadetima nastavi i njihova primjena pojača u mjesecu Ramazanu.

U tom smislu podsjećam da nam se pruža prilika, koju niukom slučaju ne treba da propustimo, a to je da mubarek-noć Lejletul-Berat provedemo u ibadetu. To je tzv. "Noć polovine Ša'bana", koja nastupa, akobogda, u ponedjeljak navečer. Ona je poznata i kao "Noć oprosta", jer u njoj Uzvišeni Allah oprašta grijehе svima onima koji se iskreno pokaju, odnosno oprašta svima osim **mušriku** (onome koji Allahu druge smatra ravnim) i **mušahinu** (onome čije je srce ispunjeno mržnjom i neprijateljstvom prema bratu muslimanu). Što je i logično, jer kako onaj koji Allahu druge ravnim smatra može očekivati da mu Allah oprostī? I kako onaj koji drugima ne želi da oprostī može očekivati da njemu Allah oprostī?

U tradiciji ova noć je poznata i kao noć u kojoj se otvara Knjiga sudbine za iduću godinu dana, iz koje se onda prenose informacije na Zemaljsko nebo sve do Lejletul-Kadra, kada se Knjiga sudbine zatvara. Zato naša ulema savjetuje da se u ovoj noći posebno, a onda i u preostalom vremenu do Lejletul-Kadra općenito, iskoristi vrijeme za učenje dova jer čovjekovu sudbinu ništa ne može promijeniti niti uljepšati kao njegova dova. U tim dovama ne smijemo zaboraviti ni svoje porodice a posebno svoju djecu, kao ni druge nama važne osobe a posebno našu braću i sestre koji su pogođeni ratom, glađu i neimaštinom.

A s obzirom da je to vrijeme kada Uzvišeni Allah donosi odluke o našoj budućnosti, to je savršena prilika da i mi donesemo neke za nas važne odluke, odnosno da razmislimo o tome šta želimo uraditi i postići u idućih godinu dana, gdje vidimo sebe i kakve uspjehe želimo ostvariti. I onda sve to što poželimo i isplaniramo trebamo u dove sročiti, a zatim se potruditi da to i ostvarimo. S tim u vezi moramo dobro znati da čovjek snuje a Allah određuje. Ništa se samo od sebe neće uraditi niti pokrenuti, niti će naše poslove iko drugi obaviti. Čovjek mora plivati i nipošto se ne smije prepustiti bujici da ga ona nosi tamo gdje želi. Čovjek će ostvariti samo ono što Uzvišeni Allah bude htio da ostvari. Zato ne treba da se ljuti ako ne ostvari sve što poželi. Neki uspjesi nisu pravi uspjesi.

I postoji jedna stvar oko koje mora dobro da se potruži da je ostvari, a to je da sačuva svoje najveće bogatstvo – brak i porodicu. Zapadni sistem života u tom smislu čovjeku pravi zamke. Teoretski podržava brak i porodicu nudeći razne vrste podrške kroz dječiji doplatak, majčinski doplatak, porodični doplatak, besplatne knjige, porodične karte itd. Ali, s druge strane praktično uništava brak i porodicu dozvolivši i učinivši dostupnim blud, alkohol, drogu, kocku, mješovite brakove itd. S toga pred svakim od nas stoji jedna jako važna odluka koju moramo donijeti, a to je – sačuvati brak i porodicu ili ih uništiti? Tj. izbjeći zamku koja nam je postavljena ili u nju upasti? Jer kada se brak i porodica jednom razvale, nikada se više ne mogu sastaviti.

A što se tiče nafile povodom Lejletul-Berata, nema neke posebne koja se preporučuje osim one standardne noćne, s tim što vrijedi spomenuti da neke sufije klanjaju tzv. Salat-ul-hajr – nafilu od 100 rekata, pri čemu na svakom rekatu nakon Fatihe uče po 10 puta suru El-Ihlas (Kul huvallahu ehad), a nakon svaka dva rekata predaju selam.

Braćo moja! U ovoj 2026. godini, u kojoj mnogi najavljuju velike događaje i tektonske promjene, vrlo je važno svaki dan iskoristiti za jačanje svoje veze sa Gospodarom, a zatim i sa svojom porodicom. U vezi sa Gospodarom sačuvati ćemo svoj iman i dobiti podršku koja nam je potrebna da prebrodimo sve krize koje nam život donosi, a u vezi sa porodicom sačuvati ćemo svoje najveće bogatstvo i emanet za koji ćemo odgovarati i pred Bogom i pred ljudima.

Gospodaru naš, Ti si Onaj koji prašta i voliš oprost, pa te molimo – oprosti nam!

Gospodaru naš, podari bolesnima ozdravljenje, siromašnima opskrbu i zalutalima uputu!

Gospodaru naš, učini da naši listovi za iduću godinu budu ispisani dobrim djelima, zdravljem i uspjehom!

Gospodaru naš, sačuvaj našu domovinu, uputi našu omladinu i daj nam snage da budemo od onih koji popravljaju stanje u porodici i društvu!

Gospodaru naš, primi dove naše!

Amin, ja Rabb-el-alemin.